

# 1 Pita

## Pita Ye Kerek Mimo

### *Kerek Kee Komo Dowad Wongkoon*

Pitambed kerek kee Rom aombed wongkoon. Wongkoon ye weeb yaa kuu Saesaa Nerombed kuristendan yemoon yenbandoone dukniwen. Anam andiwendan yaa kuu durud konde yebandi yemoon meneboon kowe, Pita ye dowaken kuu yi anam andi aromne kangdommo doberembirime ande wongkoon. Ye kuu Yuudan anam andiwen yaamomban anam andiwendan korem yaa wongkoon. Wongkoon ye weeb kuu AD 64 areb.

### *Korok Weng*

1. Amun Kerundi Weng Ibduruk (1:1-2)
2. Nub Bobni Yaa Burudande Bindi Ye God Yaningko Kankooni Ye Weng (1:3-12)
3. Karadmo Dobirime Ande Ongkandi Ye Weng (1:13–5:11)
4. Kerek Keye Kerekmen Dowad (5:12)
5. Yeenbon Kubendi Weng (5:13-14)

<sup>1</sup> Ne kuu Pita, Yesu Keresumbed kinoona ye apaso keraan.

Godbed kinoondan, okad yiri kuu yiwambibkin anambandan, buyokbayok keroone ambibkin Pontusiiwa, Galasiayiiwa, Kapadosiayiiwa, Esiayiiwa, Bitiniayiiwa aom doriib, yiyb yaa kerek kee keendaan.

<sup>2</sup> Yiib kuu kurin kurin kuu Ambe Godbed meenmendekoreked kinoon. Kukuu ye Kingkinbed karadmo ongmendi yaambéd Yesu Keresu ye weng wengambere awini ye dowadiib ye umkanbed yiib niindem aom arendi ye dowadiib kinoon.

God ye kabamoon kondoon ye mimyob dowakeniib yewenubmo dobiriyiib yiib yaa bangkandoka yiminmo kerok.

### *Nub Dowad Godbed Bindoon Ye Kerekmen*

<sup>3</sup> Nub korem nub Yariman Yesu Keresu yambe God yaningko kankoonem! Godbed mimyob miin darewoob keende nub kakman aroon kumbed, Yesu Keresu bobnoon yiri ika demboon yaambéd wadkeri yeeb kondoone, ika woonenub anam kwananeen ande meedmi anammoyiib doruub.

<sup>4</sup> Kwane, ika woonuwen yaambéd monmarindeban deendindeban korob kerindeban ye weng kunduk kanduwen. Kukuu yiib dowad Ewen ari kowoon.

<sup>5</sup> Kwane, yiib yaa dabab menebaneen kuu yiib anam andi yaambéd God yaromkonombéd dorondare oonendaneene kwane wene aron yeenbon arimbed Godbed bindaneen ye kerekmen kuu dian keraneen.

<sup>6</sup> Kuye dowad yiib kuu kubi darewoob keriwén. Aron dukmen kuu kiwaan yemoon yaambéd yiib yaa dabab meneboone yuudi areb keriwén kuned, God ye weng kunduk kuyaa kubiyiib keriwén.

<sup>7</sup> Kwane meneboon kuu yiib anam andi kuu anam ande korokbi ye dowad. Kwane anam ande awinaniib kuu Yesu Keresu dian keraneen yaron

arimbed aningko kankooniyiib nambiriyiib aningko darewoob ariyiib Godbed bangkandaneen. Kedi, yiib anam andi kuu amotbed dene karadmo keroon ye bot gold burudandoon, amborom kuu aron yeenbon arimbed Godbed gold kuu monmaraneen kowe.

<sup>8</sup> Yiib indowiib Yesu yaa wedmenindo kuned, mimyob dowaken keenimaib. Kibireb wedmenokban doriib kuned, ye yaa anam andiwe dakme id korokbinban ye kubi darewoob nambiriyiib yiib niindem aom demboon,

<sup>9</sup> amborom kuu yiib anam andiwen kumbed Godbed bindi ye yumbon kondoon kowe.

<sup>10</sup> Godbed bindi keye dowad profesidan kuu God ye kabamoon kondoon ye mimyob dowaken yiib yaa mananeen ye weng unyemanbed dakmiwen kumbed, yi kuu God Ye Weng yaambad kimingkanmo wene korobe onmiwen kuu,

<sup>11</sup> Keresu ye Kingkin kuu korokbeena Keresu kuu durud yewed kandene yoman nambiriyiib keraneen kuu komo aron arimbed komarewa kere kwananeen kuu kaadkerandamiib.

<sup>12</sup> Korokboona wedmiwen kuu yika yi dowad deme kee awinindo, yiib dowad awiniwen. Unyemanbed komo dakmiwen kuu, Ewen arimbed kowoona monoon ye Kingkin Karadmo yaambad Yesu ye weng amun dakmidanbed yiib yaa kwane daandiwen. God ye kabamoon kondoon ye mimyob dowaken yiib yaa komarewa mananeen ye weng kee engyu kangkon kaadkerandamiib kii.

### *Karadmo Dobirime*

<sup>13</sup> Kwani kowe, yiib inamen kuu God ye deme awini dowad nekwane dobirime. Yiibmeren

kangkadmime. Yiib yaa God ye amun kerundi Yesu Keresu dian keraneen yaron arimbed kondaneen kuyaa kuu, ongme meedmime.

<sup>14</sup> Arian yi weng wengambiri dana areb, yiib kuu anuk God yiibkaadbanbed dohiriwen ye inamen arewa kuye yoman ika wanaib.

<sup>15</sup> Yiib yaa baandoon ye God kuu karadmo kowe, ye areb kerenib komo komo kamandamiib korem kuu karadmo ye inamen yaambéd ambangkime,

<sup>16</sup> amborom kuu God Ye Weng aombéd wongkoon kuu “Karadmo dohirime, amborom kuu Ne kuu karadmo kowe.” andoon.

<sup>17</sup> Yiib kuu kumun mimo yaambéd nimakarub korem wengyundi ye God yaa kurikuri kerimaib kuu Ambe andimaib kowe, okad yiri doriib yaron kuu okad yiri kuu nub ambibkin anamban ande kwane doberenib uniyiib God yaningko kankoon-imamime.

<sup>18</sup> Kedi, yiibkaad kuu yiib kuu yiib awoya yi inameniibban ye dohiri yaambéd bidoon kuu od gold o od silvaa areb monmaraneen ye barangbedban,

<sup>19</sup> Keresu ye umkanbed bidoon. Ye umkan kuu barang darewoob yeman. Ye kuu arewayiibban demkoronmo ye sibi mana areb kere Burudan-doon ye orok yaron arimbed nub dowad ayiwe bobnoon kui.

<sup>20</sup> Ye kuu okadiib kumkam koremiib ongmenaboon yaron anuk yirimbed Godbed kinoona, yeenbon yaron kemaom yiib dowad angkadere dian keroon.

<sup>21</sup> Yesu yaambéd yiib kuu God yaa anam andi-

wen. Godbed ye nen demboone wadkeroone nambiriyiib konoon. Kwani kowe, yiib anam andiyiib anam id keraneen ande meedmiyiib kuu God yaambed kii.

<sup>22</sup> Yiib kuu anam anam wengambere awiniwen kumbed yiib niindem aom karadmo kerenib, aadidmiyiibban ye mimyob dowaken yiiwangkodmia yaa keendimaib kowe, mimyob dowaken darewoob kere anammo keendime.

<sup>23</sup> Kedi, yiib kuu ika wooniwen, kumban duknimaibdan yaambedban, bobnindeban ye God yaambed ika wooniwen. Kuku wadkeriyiib dowan kerindeban ye weng Godbed yedme kowoon yaambed kii.

<sup>24</sup> Kedi, God Ye Weng aombed wongkoon kuu, “Nimakarub korem kuu kereek areb, yi yirin kami kuu at wuung nong wuung areb, kereek nuubnaiwe wuung kirobimaib,

<sup>25</sup> kumban Yariman ye weng kuu aron korem angkimbaraneen.” andoon.  
Weng kee yiib yaa daandiwen kui.

## 2

### *Yesu Ye Weng Kuu Ambodiib Kowe Awinime*

<sup>1</sup> Kwani kowe, maa yaa norin wandemberembiriyiib dudanabiyiib aadidmiyiib wungkandiyiib wengamborokbanabiyiib kuu korem yidme arime.

<sup>2</sup> Dana monob yeeb woonuune muk yaa moom bobne anemoon areb, Yesu ye weng amun ye muk karadmo yaa meeni darewoob kerime. Kwane ananiib kuu Godbed bobni yaa burudande bindoon ye meeni kangdom yaa kaine amnaniib,

<sup>3</sup> amborom kuu Yariman ye amun amun kami ye kiwaan kuu yiib wedmiwen kowe.

*Yesu Kuu Wad Doreen Ye Bot*

<sup>4</sup> Ye kuu Wad Doreen ye Bot. Nimakarub ye yaa wunekariwen kumban, Godbed ye yaa kinene bobne komboroon. Kwane, yiib kuu ye yaa meniib kuu

<sup>5</sup> yiib kangkon wad doreen ye bot areb ker-iwe, Godbed bene kingkin kerekmen ye ambib yenbeena God dore nimakarub dore wedyiri do-bridan karadmo keriiib. Kowe, Yesu Keresu yaambéd yiib kuu God yaa munob koni yeman bangkandimaib areb yiibka ye yaa kingkin kerekmen yaambéd konimaiwe, yembed kuboon.

<sup>6</sup> Kedi, God Ye Weng Karadmo aombéd yedmoon kuu,

“Kedi, nembed Saiyon ye siti aombéd ambib kumundin amun yenbi ye dongka bot kowaan,

kukuu nembed kinaan ye bot, bobne kombaraan ye bot kui.

Kowe, kanembed ye yaa anam andaneen kuu, karak kandaanban.” andoon.

<sup>7</sup> Kwane, yiib anam andiwendan kuu bot keyaa bobne kubudiriwen. Kumban anam andindodan kuyi dowad God Ye Weng aombéd kwamune yedmoon,

“Bot kuu boyambib yenbidanbed kankorariwen kuu, ambib kumundin amun yenbi ye dongka bot keroon.” andoon.

<sup>8</sup> Kwane angkon ye dowad God Ye Weng aombéd yedmoon kuu,

“Ye kuu boyareb, nimakarub boknande komborok andi yeman,  
ye kuu dumnad areb, nimakarub boknande kombiri yeman.” andoon.

Yi kuu God ye weng yaa wengamberedandiwen kowe, boknande komborok andiwen. Kuye dowad yi kuu kinoon.

<sup>9</sup> Kumban, yiib kuu Godbed kinoondan, Korok Darewoob ye dore nimakarub dore wedyiri dobiridan, karadmo kamidan, God ye karuwa nimaya kui. Kwane keriwon kuu kumun yiri doriwa baande bene ye nambiri amun kai aom wooroon ye God yaa kubi wengiib yaningko kankoonime anded.

<sup>10</sup> Anuk kuu yiib kuu God ye nimaya karuwamban, kuned kibikee ye nimaya karuwa keriwon. Anuk kuu yiib kuu God ye mimyob keende kakman are nonondandi kandindo, kuned kibikee yiib kuu kwamune kandiwen.

### *Amun Amun Dobiri Ye Kerekmen*

<sup>11</sup> Nangkodmia, okad yiri kuu yiwambibkin anamban, okad yiridan yaa yiib kuu noroddan kowe, yiib yaa ongkande yedmaan kuu yiib id ye inamen kamaib. Inamen kee yiib kingkin yaa nangmene bon keroon.

<sup>12</sup> Yiib kuu God yaa anam andindodan kuyaom doriib kuu miin amun dobirime. Kwananiib kuu yiib yaa ambarakmidan andaniib kumban yiib amun amun kami kuu wedmendekore Godbed mananeen yaron arimbed ye aningko kankoonaniib.

<sup>13</sup> Yariman ye dowad kuu yiibka kankubune okaddan yi korok korok korem yi dabderem aom

dobirime. King kuu korok korok korem yi korok kowe, ye yaayiiib

<sup>14</sup> yembed ambarakmidan yaa ukum kondeniib amun kamidan yaa kube ongkandi ye aromkono kondoon ye korok korok yaayiiib kwanime.

<sup>15</sup> Amborom kuu God ye dowaken kuu yiiibbed amun kamaniib kumbed inameniibbandan yi ogood weng kebengkok anded kowe.

<sup>16</sup> Godbed ambarakmi yaa kuu yiiib be yeedere obon kerundoon kowe kwamune dobirime. Kumban kwamune doberenib aadidmiyiiibbed ambarakmi dabokne dobaraib. God ye demedan kerime.

<sup>17</sup> Nimakarub korem yi aningko kankooneniib, anam andiwendan yaa mimyob dowaken keen-denib, God yaa uneniib, king yaningko kankoonime.

<sup>18</sup> Demedan, yiiib kuu yiiib korok korok yi dabderem aom doberenib yi aningko kankooni ye inamenmo awinime. Yiiib yaa nangkemmo amun amun kami ye korok korok yaamomban, kamkonomo kami ye korok korok yaa kangkon kwanime.

<sup>19</sup> Amborom kuu kane yaa idiibban durud yewed bangkandaneene God ye dowad iwari kere kangdommo doberembaraneen kuu amun kowe.

<sup>20</sup> Kumban yiiib kuu ambarakmaniwe wurudbed yewed kondaneene iwari kere kangdommo doberembaraniib kuu, Godbed kakman Ewen arimbed kowaneen dee? Dowan! Kumban yiiib kuu amun amun kamaniwe yewed kondaneene iwari kere kangdommo doberembaraniib kuu Godbed yiiib yaa

kubendaneen.

*Yesu Ye Yoman Winime*

<sup>21</sup> Kuye dowadbed God kuu yiyb yaa baande kinoon, amborom kuu Yesu Keresu yiyb dowad durud yewed kandoon kowe. Kuku yiyb wedme kwanime ande korokbendekore ye areb kere ye yoman winime anded.

<sup>22</sup> Ye kuu ma ambarakmindo,  
ye mongkodkonombed dudanabi wengiyb ma yedmoon wengambirindo.

<sup>23</sup> Ye yaa nongdomatom ande yedmiwen kuu ye kuu neman kwamune inandindo. Ye yaa durud yewed koniwen kuu yiyb yaniin andi ye weng inandindo. Ye inamen maa keroon kuu yorokmo wengyundi ye God ye dingki ari yeka kan konoon.

<sup>24</sup> Ye kuu yekareb nub ambarakmi korem kuu ye id arimbed at ming ari karine bobnoon. Kuku nub kuu ambarakmi yaa bobnemoon areb kerubko yorokmo dobirime andi ye dowad kwanoon. Kedi, ye id yaa anbandiwen kumbed yiyb kuu wadkeri kandiwen.

<sup>25</sup> Amborom kuu anak kuu yiyb kuu sibi areb awerendobenanmo yarebimaib, kumban kibikee yiyb kuu yiyb kingkin Dorondari Ye Karub, Sibi Ooni Ye Karub, Yesu kui, ye yaa ika miniwen.

### 3

*Amered Yoom Korobe Dobirime*

<sup>1-2</sup> Kwani areb kuu nima yiyb kwangkong yiybka kankubune yiyb amered yi dabderem aom dobirime. Yiyb amered kuu Yesu ye weng yaa anam andindo kumbed yiybbed inamen kee kamaniyb kuu, yiyb wengbedban, yiyb dohiri amuniyb yiyb

inamen karadmoyiib God yaningko kankooni ye inameniib wedmekoriwa yena kuu God yaa anam andaniib.

<sup>3</sup> Yiib kerengkandimbon kuu kad angka inwari yaambed keraib, awung bedmenabe inwariyiib gold ye itoowiib ebkad amuniib kwane awenembed kerengkandi dowad inwaraib kui.

<sup>4</sup> Inamen maaaa kere yiib kerengkandimbon kuu yiib niindem aombed inamen iwariyiib nangkemiib keraniib kuu Godbed yiib yaa kubi darewoob keraneen. Inamen kee koyu yi kerengkandimbon arebban, kionne arewa keraanban.

<sup>5</sup> Kedi, Godbed oonendimaan andiwen ye nima karadmo kurin anukbed dohiriwen kuu kwamunemo kamiwen. Inamen kee awiniwen kumbed kerengkandimbon keruwen. Yi kuu yi amered yi dabderem aom dohiriwen.

<sup>6</sup> Yi kuu Serambed Abraham ye weng wengamberenu ye yaa ne korok andimaun areb keruwen. Yiib kuu inamen yorokmo kamenib uniyiibban dobaraniib kuu yu meed keraniib.

<sup>7</sup> Karub yiib kwangkong yiib amered yaa awandi ye meenyiibbed dohirime. Yi aromkono kuu karub yi aromkono arebban, darewoobban kowe. Angkon yi kuu yiib yoom kabamoon kondoon ye wadkeri kandaniib kowe, yi aningko kankoone awandime. Kwananiib kuu yiib kurikuri God yaa daani ye kiwaan kebenaranban.

*Arewa Meneboon Yaa Neman Kwamune Inandaib*

<sup>8</sup> Weng yeenbon kuu, yiib korem kuu inamen mimo meeni mimo kerenib ambanga oniya

yaa mimyob dowaken keendimaib areb kerenib, dabab meneboondan yaa mimyob keendenib yibkareb kankubunime.

<sup>9</sup> Karub kanembed yiid yaa arewa kamaneen kuu neman kwamune inandaib. Angkon yiid yaa nongdomatom ande yedmaneen kuu neman kwamune inandaib. Yiid yaa kwamune kamoka ye yaa neman God yaningko yaambéd amun kerunime, amborom kuu Godbed yiid yaa kwamune kamime ande kinoon kowe. Yiid kwananiib kuu yiid yaa God yaningko yaambéd amun kerundaneen.

<sup>10</sup> Kedi, God Ye Weng aombéd yedmoon kuu, “Kane kanembed kubembirimame amunmo do-barandamiib kuu, weng arewayiid dudanabi wengiib kuu deere-wande korondime.

<sup>11</sup> Arewa yaa koronde amonombe amunmo kamenib, yewenubmo dobiri ye kiwaan onme wedme kwari dobirime.

<sup>12</sup> Amborom kuu Yariman kuu yorokmodan keendombere oonene, yi kurikuri yaa korobe wengambirimaan kowe.

Kumban Yariman kuu arewa kamidan yaa manmo keroon.” andoon.

<sup>13</sup> Ma, amun amun kami kuu yiid dowaken darewoob keraniib kuu karub maa yiid yaa yendaneen dee?

<sup>14</sup> Kumban yiid kuu kwamune inamen yorokmo kamaniwe yendaneene durud yewed kandiib kuu Godbed amun kerundaneen. God Ye Weng aombéd yedmoon kuu, “Yi komo komo yaa

unimaib kuu yiyb kuyaa unaib, binangke unembaraib.” andoon.

<sup>15</sup> Ma, yiyb inamen aombed Yesu Keresu yembedmo kuu nub Yariman andime. Yiyb kuu Yesu yaa anam ande meedme doriib yaa karub kanembbed kaamondi ye dowad kuu nekwe doberembirime. Kuned yiyb inandi kuu emayiyb kaamonoonman ye aningko kankooniyiyb

<sup>16</sup> ambarakmiyiybbaan ye inameniib kwane kerok. Kwane inandaniib kuu kane kanembbed yiyb amun amun kami Yesu ye dowad awinimaib yaa inamen arewa ande yedmaniib kuu, yi weng arewa yaa karak bobnaniib.

<sup>17</sup> God ye dowaken keroka, yiyb kuu amun amun kamiiwe yenbandaniib, kedi, amun amun kamiiwe yenbandiwa durud yewed kandi kuu amun, arewa kamiwed yenbandiwed durud yewed kandi arebbaan.

<sup>18</sup> Kedi, nimakarub yi ambarakmi korem ye dowad kuu Keresumbed mimo bobnoon, yorokmomanbed yorokmobandan yi dowad bobnoon kui. Ye bobnoon kuu God yaa yiyb be mananded. Ye id ayiiwa bobnoon kumban, ye kingkin yaa kuu wadkeri konoon.

<sup>19</sup> Kwane, ye kingkinbed wenene dukniwendan yi kingkin wii aom doriib yaa ye weng daandoon.

<sup>20</sup> Yi kuu kurin kurinbed Noambbed motod yengboon yaron yi dowad God kuu yodbirimbaban iwari meedmo doreen kumban, God yaa wengamberedandiwen. Motod aomniwendan kuu yemoonban, kaning kaningiibmo kuu okbed yukne yeen yaa burudande bindoon.

<sup>21</sup> Ok kee Godbed yiyb bindi ye baptais kerundi

ye kumun korokboon. Kukuu yiib kad angka koroom okambi ye dowadban, God ye dowaken yaambéd dobaraniin andi ye inamen ye dowad kui. Kukuu Yesu Keresu bobnoon yiri ika nen demboon yaambéd Godbed bindoon.

<sup>22</sup> Ye demboon kumbed Ewen ari daanekore God ye dingki wiwi angkambéd doroon, engyusi-  
iwa kane kane korok keriwendaniwa kane kane aromkono keriwendaniwa yi kuu ye dabderem aom doriib.

## 4

### *Yesu Ye Inamenmo Awinime*

<sup>1</sup> Kwane, Keresu kuu ye id kuu durud yewéd kandoon. Kwani kowe, yiib kwangkón ye inamen areb kere aromnime, amborom kuu kane kuu ye id durud yewéd kandoon kuu ambarakmi yaa kuu korondoón kowe,

<sup>2</sup> kwamune kandoon yaronbed nare ari kuu, ye kuu ye id ye inamen yaambéd dobaraanban, God ye dowaken yaambéd dobaraneen.

<sup>3</sup> Kedi, God yikaadbandan yi dowaken yaambéd dohiriwen areb yiib kuu anuk kwamunemo do-  
biriwe aron yiminmo kereen. Kowe, keye in-  
amen kee, id ye dowaken kamiyiiwa nenem  
kami ye moomiiwa ok arewa yemoon anem-  
biriyiiwa disko andenabiyiiwa dudi god yaa bu-  
mangke kurikuri keru ye inamen miin arewayiiwa  
kamembirimaib kui.

<sup>4</sup> Kwanimaibdan wedmiwen kuu yiibbed yi yaa  
dabokne kamokban keruwen kowe, ke komarewa  
kii andenib yiib yaa wengamborokbanabiwen.

<sup>5</sup> Kumban yimbed komo dowad kwamenabiwen ye weng kuu wadkeridaniib dukniwendaniib yaa wengyundi dowad nekwoon ye God yaa dakmaniib.

<sup>6</sup> Kwanikob, dukniwendan yaa kwangkon Yesu ye weng amun daandoon kowe, yi kuu nimakarub korem areb yimbed wad dore ambarakmiwen kuu Godbed wengyundaneen kumban, Godbed doreen areb yi kuu kingkin ye kerekmen yaambad wad dobaraniib.

*God Ye Deme Yaromkono Kuu Korobe Awinime*

<sup>7</sup> Kumkam korem yimin wandi yaron kuu dia kereen. Kwani kowe, korobe meenenib yiiibka kangkadmime. Kwananiib kuu yiiib kurikuri kuu yimin keraneen.

<sup>8</sup> Inamen darewoob ari kee mimyob dowaken darewoob neman keenoon keenoon kamime, amborom kuu ambarakmi mimim yemoon kai kuu mimyob dowaken kumbed dabune kebenimaan kowe.

<sup>9</sup> Mungkubmangkawiibban kumbed neman angkodmenoon angkodmenoon kamime.

<sup>10</sup> Yiiib mimim yaa kuu Godbed ye deme awini ye inamen mimim kuu kabamoon bangkandoon. Kuuu Godbed kabamoon kondoon ye mimyob dowaken ye deme mimim kowe, yena yaa ambangkane awandi dowad korondiyiiibban kwane ambangkime.

<sup>11</sup> Kanembed God ye weng daandi ye deme awinoka, kaadkerok, Godbed daandimaan areb kerok. Kanembed awandi ye deme awinoka, Godbed yaromkono kondoon kumbed awandok. Kwananiib kuu komo kami korem kumbed Yesu

Keresu yaambéd God yaningko kankooni yeman. Ye yaa kuu nambiriyiib aromkonoyiib kerok, aron korem korem. Anam kwanok.

*Kuristendan Kuu Durud Yewed Kandaniib*

<sup>12</sup> Nangkodmia, durud yewed ye dabab yiib yaa menebeen kuu yeka mamaa norod ye komboon menebeen manok ande meenenib binangkaib.

<sup>13</sup> Kuned yiib kuu Keresu durud yewed kandoon ye dungkun kandiwen kowe kubime. Kwananiib kuu ye nambiriyiib dian keraneen yaron ari kuu kubi miin darewoob keraniib.

<sup>14</sup> Yesu yaa kongeniwen kumbéd yiib yaa weng arewambéd damangkandaniib kuu Godbéd yiib yaa amun kerundoon, amborom kuu God ye Kingkin nambiriyiib yiib yaa ibnendoon kowe.

<sup>15</sup> Yiib durud yewed kandi ye ambokab kuu kumka kumaniwa yid biyiiwa ambarakmi yenayiiwa o no wingkanambengkaniib kuyaambéd kamaib.

<sup>16</sup> Ma, yiib kuu kuristen keriwén ye dowad durud yewed kandaniib kuu karak bobnaiib, Keresu yaningkoyiib yiiwaningko yaa ibmo daboknoon kowe God yaningko kankoonime.

<sup>17</sup> Kedi, nimakarub yaa wengyundi yaron kuu muneen. God ye nimaya karuwa yidin yaa wengyundandeen kowe, God ye weng amun wengamberedandiwendan yaa komarewa wengyundaneen?

<sup>18</sup> God Ye Weng aombéd yedmoon,  
 “Yorokmodan bobni yaa burudandé bindaneen  
 kuu yobdood kowe,  
 Godiibbandaniib ambarakmidaniib kuu  
 komo keraniib?” andoon.

<sup>19</sup> Kwanikob, God ye dowaken yaambéd durud yewed kandiwendan kuu, ma korondiyiibban ye Ambengkan God ye dingki ari yiibka konenib, amun amun kamembirime, korondaib.

## 5

### *Ongki Weng Kurikuri Aamkono Aamkono Yaa*

<sup>1</sup> Keresu komarewa durud yewed kandene bobnoon kuu ne indowiib wedmeni, nambiri dian keraneen yaa daboknaneen ye karub kereni, nangkon kurikuri aamkono keraan kowe, yiib kurikuri aamkono aamkono yaa ongkandi weng yedmandamaan kukei.

<sup>2</sup> God ye nimaya karuwa yiibbed ooniibdan yaa sibi keendombere oonidan areb ongme keendombere oonime, yiib yaa yenambéd ande dedmoniyiibbedban, yiib dowaken kerundimbed oonime. Kukuu God ye dowaken yiib yaa. Kuye deme ye kakmaniib kandi ye inamen kowe awinaib, awandi ye dowaken darewoob kumbed awinime.

<sup>3</sup> Yiib dingki ari kondoondan yaa dedmobende keanime kwanime kami ye korok keraib. Yiib dohiri amuniib weng amuniib kumbed yi yaa inamen amun korokbendime.

<sup>4</sup> Kwamaniib kuu Korok Korem Yi Yariman angkadaraneen yaron arimbed korob kerindeban ye kakman nambiriyiib king ye korok ari dereni yeman areb kandaniib.

### *Ongki Weng Kuristendan Korem Yaa*

<sup>5</sup> Keweda koyuya, yiib kangkon aamkono aamkono yi dabderem aom dobirime. Yiib korem kuu yiibkanmo yaa kerengkaniibban kankubune

yirimbed dobirime, amborom kuu God Ye Weng aombed yedmoon,

“Godbed kerengkandan yaa manmo kerimaan, kumban yika kankubune yirimbed dobiridan yaa ye kabamoon kondoon ye mimyob dowaken kondimaan.” andoon.

<sup>6</sup> Kwani kowe, yiybka kankubunenib God ye dingki dabderem aom dobirime. Kwananiib kuu God ye dowaken keroon yaron arimbed benkoobaneen.

<sup>7</sup> Ye kuu yiyb yaa dowakeniib kerene awandembirimaan kowe, dabab yaa meeni darewoob korem kuu ye dingki ari nongkobime.

<sup>8</sup> Yiybkareb kangkadme keenombirime. Yiyb bonman, Seten kuu laiyan arud kabang kameen kumbed nimakarub anandameen areb yarebeen.

<sup>9</sup> Yiyb anam andi kangdommo doriib kumbed ye yaa manmo kerime, amborom kuu yiyb kuristen angkodmia okad yimin yimin yaa doriib kuu yiyb durud yewed kandiwen areb kwamune kandiwen kuu yiybkaadkeriwen kowe.

<sup>10</sup> Kabamoon kondoon ye mimyob dowaken korem ye God, Yesu yaambéd dowan kerindeban ye nambiri dabokni dowad yiyb yaa baande kinoon ye God kui, yiyb durud yewed kandiwe kibikbed nare ari aron dukmen keraneen kuu yembéd yiyb yaa demkoronmo ongmené anam andi kangdommoyiyb aromkonoyiyb kiringmindeban ye anam andiyiyb kondaneen.

<sup>11</sup> Ye yaa ooni ye aromkono aron korem korem kerok. Anam kwanok.

*Kubendi Weng*

<sup>12</sup> Ma korondiyiibban ye kuristen angkodmi Sailas, kuu kwamunemo wedmemaan kui, ye kuu awawoonkob kerek dukmen kee yiib yaa wongkane keendaan. Yiib yaa kube ongkandeni weng keyaambed Godbed kabamoon kondoon ye mimyob dowaken anam kuu korokbendaan. Keyaa kangdommo kere dobirime.

<sup>13</sup> Yiib ibmo kinoondan Babilon aom doriib kumbed kubendi weng yiib yaa keendiib kii. Ne dana Maak kangkon kwamune keendoon.

<sup>14</sup> Yiibkanmo yaa mimyob dowakeniibbed kubenoon kubenoon kamime.

Keresu yaa ibmo dabokne doriibdan, yiib ko-rem yaa yewenubmo dobiriyiib kerundok.

**Buk Baibel long tokples Yongkom  
Genesis, Psalms, and The New Testament in the  
Yongkom Language (also called the Yonggom  
language) of Papua New Guinea**

copyright © 2003 The Bible Society of Papua New Guinea

Language: Yongkom

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

b3f9b0a2-8cdb-5470-8e3c-8250231eee99